

四庫全書

子部

欽定四庫全書

子部

六藝之一錄卷三百九十七至九

詳校官中書_臣陸 湘

貢外郎_臣牛稔文覆勘

總校官檢討_臣何思鈞

校對官助教_臣胡予襄

謄錄監生_臣鐘廷琰

欽定四庫全書

六藝之一錄卷三百九十七

錢唐倪濤撰

歷朝書譜八十七

元賢墨蹟

燕國材板餞帖

行書

公楠記事上復義齋宣慰相公足下比承訪別殊用黯
然明發遣小者造門板餞則馬首先登矣茲枉顙題寵
有煮醢鹽鱠之貺遠道胡為來哉拜嘉之餘礪感無量

佇聽除書又當別控賀章也帝城書不敢浮沉得報即以繳達何當晤悉臨楮拳拳不宣公楠記事上復夏五廿四日

方萬里台翰甚多帖

行草書

回謹呈呂君學士宣除尊契家丈回收台翰甚多日昨姓葉之人始來取答字口所稱執事之意為令閭政之同氣有家產之訟回於曹弘齋相契而凡百公事並不敢干預於歛之有司無所施其巧也千萬勿罪幸甚百

冗走筆他不暇及不宣 右謹具呈大德四年閏八月初二日回呈記事謹呈呂內機學士尊契家丈

鮮于伯機檀波羅蜜帖

行草書

先塋園牆急用四獸像欲求寺院砌地厚大方磚五枚
宗師或有之不知湛淵子可以下一轉語否檀波羅蜜
亦當行所當為事必不吝也呵呵樞頓首湛淵路教翰
學先生八月廿六日

高房山眠食安好帖

克恭頓首再拜仲實聘君先生閣下別來伏想眠食安
好為慰區區輒有少瀆故鄉劉光遠先生飽學老成今
春留家兄子安處授徒今江西何參政專書敦請到彼
擬廿四日卜行特求大手作一序贈之以見交誼遠望
慨然不勝感激專容面謝以既未間仍冀為斯文自重
不備克恭頓首再拜九月廿二日謹空

程雪樓可人帖

行書

文海頓首再拜月庭教授學士足下薄歲來歸緬想可

人於千里之外新春使至故意何長開以嫺聯良厚不
薄遂先君無恙日媒妁有以近曲一二言悠悠未決比
抵家尋約卜之叶從遂且然諾聞命惜晚如何如何義齋
貽書中以重禮不敢當也亦不敢拒也受飧反璧可乎
往復間幸為道謝意臧簿猶未過此同文并福寧記俱
欲得數本便中示及幸幸讎言簡率尚規嗣陳不具文
海頓首再拜元夕後一日

袁清容舊歲北歸帖

桷頓首再拜習卿經歷郎中尊兄執事桷舊歲北歸以
長兒之喪蒼黃渡江不得一詣行館非有簡慢相別兩
載第聞貴名日起為吾道重不肖踪跡困滯實有望於
激昂也桷歸舍以歉疫之餘且學治生薄田隸吳門每
困膺役近覩新條欲從使臺求一牒文為脫免計元籍
儒生復係寄莊似可施行倘得崇篤力加覆護一飯必
祝寧敢忘所自也詳委令家奴控露臨紙增念伏希垂
諒不宣桷頓首再拜記事再拜上習卿經歷尊兄契弟

袁桷謹封

袁清容同日分塗帖

行書藍紙本

桷頓首再拜明復真人契舊侍者仲夏與公同日分塗
一就沙漠一臨湖山情況清濁判然有分此正是太極
肇分時節不審玄覽為何如超然澄觀燕處順宜伏惟
道履堅固桷留滯周南未易得告瞻企珍遽實不勝情
族叔德平謁選將注畏寒先歸欲見仙風道骨共議瑰
室相交之理談論綿密必有神契念久違色笑遂奉此

紙便中時賜教藥尤仍不忘霜寒切希照亮柄頓首再拜

鄧善之與本齋札

文原頓首再拜總管相公本齋先生閣下文原不意慶門為福所倚堂上竟以微疾奄至大故聞訃驚惶曷能為情然壽母以貞節終始有子克盡孝道為時良二千石亦可無憾九泉矣銘文見委義不得辭屬體中畧苦風寒而來使以河冰不能久留未免力疾屬稿且繕寫

納去其於發潛德則未之有取也遺貺益增愧慙地遠
不能引却悚然而已人還率爾具復冬令嚴寒惟順理
節哀是禱總干照察文原頓首再拜 來諭一一為嗣

口言之自有書奉答銘文中為字有失筆別篆紙末壽
康菴記來使趣行當行驛使便納上來使勞中統一

鄧善之職米帖

行草書藏經紙本

收職米後宜厚稿之也文甫亦自供糊窓之勞他可想
矣此書自新安發恐慶長已過宣故特作此吾妻凡事

耐心小姐而下想皆安文原書致賢妻縣君十二月三日一書與眉叟便付去家中謹風燭此書附徽州典史赴省便回時附數字來報平安為佳書中所言同知之說吾妻自知之不必言

鄧善之杖錫見過帖

行書

文原和南上賢叟長老禪師侍者去冬承杖錫見過極慰久別之懷區區一病年餘仗庇幸安但起居飲食尚未復常作書輒目昏腕弱故筆硯亦久廢塔銘已藁就

令小子寫去贊語併呈似殊愧未工耳何時乘便到杭
相與傾倒珍重珍重不具文原和南上

汪國良假舟帖

從善頓首拜復居竹譜達提舉文几從善昨承惠書無
有佳貺謹依收領所有假舟之事四月初可遣一介來
從善今只在初七八日間可起乞知之如會雲西提舉
望通拜三意是幸人回草此伏希照亮從善頓首再拜

二月十二日

巖子山十二月十二日帖

喀喇庫庫頓首再拜彥中管勾賢友足下十二月十二日
金子振宣使至得教字深荷遠懷之至中間見誨實是
下心然亦自有公論也於此足見足下篤于吾昆弟至
深不省惟多馳感耳不知來春可果至都不付下棋枰
帽等皆已領此時請家兄使想已達度賢友亦必喜也
此間公私皆望家兄早來開報吾兄知之文書一節克
明甚是用心緣不肖小女病旁添四五十日竟至逝去不勝悲塞奈何奈何

身常有微恙不曾與克明相見近月半日來方出當與
彼論之後便奉報末由奉見願盡珍重理今因人便草
草不宣喀喇庫庫頓首拜十二月十四日書 諸般雜色
素箋及建連付來些小為禱銀朱亦望惠數兩欲為印
色此中者不可故也彥中管勾賢友足下喀喇庫庫謹
封

虞邵菴與總管札

集頓首再拜上狀總管大尹相公閣下即辰歲事告成

天地方泰暫弭皇華之節尚系白雲之思神明夾扶履
用清吉集今夏復過姑蘇不能少候騎氣之還已覺悵
惘及承珍灑乃知追及惠泉益重不敏之臯然而千里
明月通夕台星何異瞻對顏色也亭中清話秋仲間翁
自上京還方面及之節次當已達聽茲不復贅觀僧辱
位置造就倍費神用不勝感激集與弟兄皆宦遊四方
先隴寄彼動輒曠引時歲無由一至托此於一二鄰近
而已而食不足贍給今得此稍慰其望則集可以少抒

其情然則閣下錫類之仁何可忘也引墨陳謝未究下
忱之萬一惟冀保晉方今龍飛御天求賢共理有若閣
下治最久當簡在行膺大用匪伊朝夕集雖不武尚能
泚筆來賀謹奉狀不備集再拜狀上

虞邵菴奉記都運帖

奉記都運大參相公聊致久別企仰之萬一采覽幸甚
虞集頓首 計相淮南重檐帷海上還頻煩紆智畧周
慮及疲孱調鼎公宜早歸畊自得閒常攜相贈策扶老

向江山

集至逍遙山見饒紫巖間將適瓊華之園當以舊吏瞻承風采因此附候起居紫巖玄門耆宿之士退食之暇必能少從清靜無為之論遙為傾企集又拜二月五日

虞邵菴不及入閣帖

行草書藍紙本

集頓首再拜集伏審博士學士榮上適苦創不及入閣奉賀千萬勿罪二書贊托經筵掾持上望為分付幸甚明日觀游誠恐院中難聚更告為請假一二日拜賜多

矣集頓首再拜丹丘博士公左右

杜伯原與本齋札

本頓首再拜尚書相公本齋先生文侍舊臘率易晉拜
旌麾之下辱賜與潔殊慰積年仰慕之心宴贐稠疊禮
意隆重何以克堪惟深愧感而已別來伏想福祥至止
百神衛護以士民之望旋膺鈞樞之任至慰本擬以正
初抵抗方聞江上有阻遂自泰興江陰展轉留滯二月
初方達吳門得會季野舍人同到金井山中瞻視岡巒

形局寬大氣勢雄偉與閨相合謂為福壽之基亦頗如
諸名公所論而鄙淺之見尚有可疑者蓋入手山脉直
下稍長則乘氣勁急倘稍加轉換庶合古人增高益下
趨吉避凶之說必欲如閩下龜蛇之地山盡水聚生意
藏畜則未能悉其造化之妙亦非面對不能詳盡惟高
明裁察茲因人便謹奉起居以致謝私併敢獻其一得
之愚蕪率伏祈恕亮餘惟為國家衛愛式副對揚不備
二月十八日客吳中杜本頓首再拜上呈

黃大癡手札

公望頓首寧極路教先生閣下近侍誨談終日歡甚奉
違後連日不克欸教渴心又將塵矣恃愛欲求大手臨
黃庭樂毅論二帖以為矜式雖天寒暝閣春溫想不廢
執筆也片楮代稟統于心照公望再拜寧極路教先生
閣下公望摺申

汪尚書手札下及帖

行書

澤民頓首奉復季實博士鄉彥文侍王善夫至手札下

及舊故足仍不忘隆寒遠審北堂壽福綵侍悅愉深用
慰懌新安素稱名郡賢達輩出紀諸史冊可徵也何期
羣盜流毒一至于此所不忍聞往事已矣天佑此邦得
精選新班

下闕

黃文獻免穎帖

行書

潛比承遠賜誨墨及新茗之貺乏便未由答謝茲辱珍
灑與免穎之惠尤用媿悚第以大閫專使一見即行索
報甚武奉字弗謹尚容嗣狀以既所欲言首祈恕訾不

備三月五日潛代簡并覆延慶堂上四窓大法師

歐陽原功虞雍公文序簡

玄頓首再拜伯溫監司相公仁契玄去歲數四附書憲
府邃嚴未審一一達几下否春和遠惟履候勝常殊慰
詹遡書來知刻虞先生文足見高誼作序當求名筆乃
稱雅意諒切不敢力辭因便輒貢藁去刻成千萬見惠
一本為感賤跡遂丐閒之請鄉里距貴治稍近專容修
竿牘乏教未中惟順序善葆不具備辱契歐陽玄頓首

再拜二月十一日謹空

歐陽原功與李野札

玄頓首再拜李野府判相公仁友玄於左右雖踈而英
譽綽甚矧於先清獻公實有一日之雅向歆克肖契誼
不殊相望千里之遙情親對晤有以也夫近者李道盛
雅以清獻神道碑見屬既而傳旨下諭不敢以病憊控
辭已繕寫付李德今聞託張德常轉達第愧兵後罹憂
百感交集何能發潛光之萬一太湖多善碑材刻成以

拓本見寄為幸德常附海艚行匆匆亟奉起居草畧併
干台照客京歐陽玄頓首再拜 李畊照磨同致再三
意玄又白

余廷心兩得從游帖

闕再拜啓史館兩得從游豈勝榮幸區區南行又辱盛
饒尤其感烈也鄉暑伏想文苑優游雅候動履多福良
慰良慰友人趙子章北上觀光謹此附謝子章有學而
能詩得公眴睐當價增三倍矣仲舉至道以聲景先中

夫希元鳴謙諸先生處不及別狀望致下忱為感餘惟
自重不具五月五日闕再拜太朴內翰先生閣下

曹雲西交訊帖 行書

知白手書拜記南金教授學士講下知白稍不交訊已
極傾依兩日前復齋來知動定頗悉為慰且承與伯暘
聯篇雅製尤感令岳母傾逝失於遣奠茲禁伯蒙處便
謹附短書以致區區隨書緘上統鈔廿兩少充賻贈之
儀望勿以輕鮮而為焚白是幸人行亟不及詳具草畧

幸祈奎炳不具知白手書拜記二月望前一日

米起山龍瓶帖

行書

米起頓首再拜鶴皋先生文侍久不致書尺而嚮仰之心常為之東注迹踈心邇期不以此為間也閒居中偶有一事奉浼向者家下初析之時有官窰山龍瓶二枚愚與白弟各得其一今欲以山龍瓶一枚相易庶幾為全璧可否試一言之就致敬雲西居竹二親家草草不謹米起頓首再拜 近自吳中得奇書數十種其金樓

子漢武故事等書皆范石湖家藏然所費不貲矣

鄭明德溪詩帖

德元學士佳公子侍次前日盛氣到溪詩欲以稍訴不平不意從者方為令弟合色殊倥偬不得遽盡其所欲言明發到西堠巧值清虛君出只得盤桓留以俟其歸鄉廬兩記見屬許以白紵使元祐得挂名常學與忠義之邦人均於不朽則記雖無潤筆亦誼在所當為今不肖無與而題者作謔人須當厚其禮以見勞不然則元

祐豈木石也哉以故專書上請元祐今見留西壩若有
謝意即望遣一人來庶乎消泯不平賢主賓俱不失禮
於野老也令高弟仲端尤為謹飭之士試以元祐此情
言之仲端亦豈能私於其親也冬寒惟厚愛不一一嘉
定十日鄭元祐肅拜謹記

朱澤民來翰見答帖

行書

德潤頓首再拜復季實教諭即翰學宣除春中王達善
山長過吳曾奉書去茲承來翰見答乃知文旆尚留寧

國方榮甫來具審履候康勝且有玄墨之惠領外多感
今就封去畫大小四軸郭熙風雨圖雙幅雪霽山行雙幅許道寧獨幅二軸至望
目入便中更乞回字以慰遠懷專此以復將命餘容面
既以盡不宣四月廿一日朱德潤頓首再拜

蘇西坡未獲便郵帖

行書

大年敬啓德常判府相公先生侍史別來未獲便郵有
疏申詞之儀且聞離練川時父老居民送者填塞扁舟
奉老親載琴書飄然而去豈不高哉遐想視政供養之

餘神相起居多福何生幼而有志於學久處州庠諸生之列來過雲間謀為讀書養慈之計冀有遇焉先生思所以處之餘希文照不一一具白十月廿八日蘇大年再拜

顧定之雪川奉別帖

雪川奉別忽又半載其如馳仰何時秋暑可畏人迴審文候清適為慰不肖塊坐荒山無足為道法帖承出售價金茫然不至極令人瞻企耳欲就城收糴倉麥合醬

望吾友依數付去者來為感非恃足下至契豈敢如此
干聒千萬望賜發來如受惠一也熱甚草草不具顧安
頓首惟明茂才徵君賢友足下

饒介之抱疾衡門帖

行草書

介白抱疾衡門忽辱車騎枉顧獲瞻顏色殊慰久懷後
一集亦足矣第以不能走謁為慊也年粉秣漿聊以為
禮雖不足具從人一供倘勿以訝而留之甚幸甚幸千
瀆清嚴餘俟面雪不具 介再拜白士行國士先生侍

史廿七日謹空

饒介之琴軫帖

琴軫望力為取成就此琴今日所見諸物宜留下琴今
送去煩看過贖解銅錢准明日送去草草介白事唯允
鄉姻畏友六日空 明日有便往杭州若附一書與蕭
生發琴軫足來佳有此便敢煩不一廿四日介白事
唯允鄉姻畏友謹遣

張仲舉與季京札

翦頓首上記季京郎中相公契友閣下奉違晤言已閱
數歲比聞使馭上三山尋又聞在武林而一皆平安之
報良用自慰區區備員翰讀近又承乏曹監昏懶日侵
告歸未允其貧而無子猶故吾也僕滿意季德之迴豈
意有此凶憂為之痛心况手足至親其終天之恨當何
如也尚在以人生有數少自寬解為禱季野令兄相公
如會萬萬名不及顙狀燕吳相望海航往來動以年
期惟珍護自強前即遠大不宣中秋日老蛻張翥頓首

上記

楊鐵厓僕客雲間帖 行草書

維楨再拜奉復理齋明府相公閣下僕客雲間每於別
駕顧公座上談及州縣之職惇教厚俗惠以及民禮以
加士而明允以平獄訟未嘗不以閣下為首稱非特為
吾道喜實為世道慶也未幾文仲錄到先賢祠狀謁文
為志於是樂書其事實補盛朝缺典伯融涉海來出書
稱謝兼有潤毫之禮登領不勝愧感文齋真樂奇子嗣

容續筆付文仲的便送上也伯融回舟甚速不可留姑
此奉復不宣十月廿有六日客松庠主文抱遺叟楊維
楨再拜理齋明府閣下

楊鐵厓與德常札

八月四日老鍊楨帖上德常相公先生屢承問病乏力
不能接對今日體力稍勝忽老胥吳讓者泣拜牀下自
陳八年淹滯相公憐之欲行參補而有優游不斷者阻
之閣下窠缺告天無路惟有覓死地而已其情可哀今

假老夫一言欲相公補押一案為來官收錄之階必公
賜可此事不徒協衆論亦繫相公平日陰德事也扶病
為布此楮惟冀委察焉不具楨帖上悚恐謹後空

倪雲林與慎獨二簡

瓚頓首再拜慎獨有道先生執事瓚久不上問惟是懷
仰之私無日不動秋氣涼冷不審何似伏惟隱居求志
教授鄉里有下帷談道之樂神相德人百福萃止欽嘆
何限瓚七月末忽感瘧下疾兼旬乃瘳近尤惛惛耳恃

以道誼之契輒有浼瀆養正一子八歲矣使知所趨向
以為禮義之歸不可不慎其始也養正賢母子熟聞其
先公誦歎其德美之盛願闢私塾以俟杖屨之臨寓所
謂河潤九里者非但小子蒙福也未敢冒昧以請俾賤
者敬致一言於左右能附從其私情幸甚詳曲當別奉
書以聞就此月到館中為便也僭越上瀝高明惟有悚
恐仰冀恕亮不備瓚頓首再拜 海嶽菴圖旦晚臨摹
畢即全璧以歸也 酒二大尊漫上九月二日瓚又空

瓚再拜奉書慎獨有道先生執事霜寒伏想尊履請謚
養正冒昧選取今月十八日闕私塾招延先生講授其
中謹預於十三日敬致少幣禮於執事者至乞領意幸
甚不及作啓陳情惟委恕焉不備 紵絲一端羊一牽

准銅錢
一定

果一筐酒一甕 友生倪瓚再拜

倪雲林月初發舟帖 行楷書

瓚再拜久不承教言唯深瞻詠比來想惟尊候安康因
學生體中小不快遂失迎候月初發舟往也九月中聞

許公令乃嗣攜至畫軸而賤子適不在先生來館之日
幸再約之同一來千萬千萬及陳以吳曾攜薛紹彭道
祖大字正書杜詩見示近問之云是朱益之家物幸一
扣之先生或與就帶至也瑣事溷煩得罪得罪謹勒手狀
不備瓚再拜啓上慎獨有道先生執事廿八日謹空
慎獨有道先生執事倪瓚啓上

倪雲林三印帖 行楷書

瓚再拜久不承顏色懸情比來想惟尊履多福篆至三

印文甚佳但幻霞文差大不欲橫寫如開元紹興豎寫
再煩篆惠也泰山刻借一閱幸甚銀魚乾新自江上至
者一筐漫上寒眇悚恐謹勒手狀匆匆不具瓚啓上知
已員外相公執事初九日

倪雲林竹處帖

行楷書

瓚啓昨日水竹處飲後造謁陶令有云但恐多謬誤君
當恕醉人者耳嘗約今早同惟寅到田舍蔬飯適病酒
未可起亦為兄所迫待其父起亦即過雅會堂遂不敢

再速亦恐安素堂早飯甚早料此時必飯訖矣輒有羊頭一個鴨蛋八枚酒一尊幸執事午刻舉一杯酌惟寅也僕昨日見仁儒過田舍時頗有難色僕亦矜此物可有可無之耳非若圖書墨研不可少之物况僕平日甚不喜奪人之愛以滋已之欲僕之于一切珍玩所謂寓意而不留意者蓄之既久為人博易持去畧不靳惜蓋若烟雲之過目也仁儒珍物僕得一玩足矣奚以博易為哉三二日當復以歸之趙矣謹此咨啓勿勿不具瓚

再拜克用先生侍史十三日謹空 幸為致意安素先生于兄事已言之矣瓚

倪雲林與良常詩翰

聞道淮安之任去尊君合住叔弓家來城又鼓吳淞柁
好過吳淞弄釣車 比聞從者來吳城旦夕之官淮安
復往吳淞迎尊君矣舟經笠澤能一枉顧否因令弟德
機徵君之便輒成小詩以寄倪瓚再拜良常判府明公
執事 比附蕭從善一書往曾達否瓚廿五日謹空

瓚再拜新春伏惟履候多福欲往展賀村野畏人不出
耳昨有數字與令似想曾過目畫匣倘要用當送去無
用則已先公竹杖脚爐小巾倘有之希尋以見惠無則
不煩也玄度入城何日還還日為致意謹承候匆匆不
具十一日瓚啓上良常先生執事

至正辛丑十二月廿四日德常明公自吳城將還嘉定
道出甫里振柁相就語俯仰十霜恍若隔世為留信宿
夜闌更秉燭相對如夢寐者甚似為僕發也明日微雪

作寒戶無來迹獨與明公逍遙渚際隔江遙望天平靈
岩諸山在荒烟遠靄中縷織出沒依約如畫渚上疎林
枯柳似我容髮蕭蕭可憐生不能滿百其所以異於草
木者獨情好耳年逾五十日覺死生忙能不為撫舊事
而縱遠情乎明公復命畫江濱寂寞之意并書相與乖
離感慨之情悰德常今為嘉定同知於民有惠政即昔
日之良常山人也朱陽館主蕭閒仙卿倪瓚言

倪雲林與玄度札行書

瓚承示答所云無以奉長者又云為厨傳擾又云午餉
候詣彼吁可歎哉所謂癡人前不得說夢也前之言直
戲之耳足以見吾子之孺惡罕出入也幸即過我相與
話言瓚頓首啓玄度徵君

沈仲說與慎獨詩簡

東林薄酒試新嘗中有松花膩粉香遣送潁川陳有道
書齋渴飲勝茶湯廿八字偕一壺薄酒奉寄上惜不
多耳楊誠齋文藁不曾收得所謂芍藥屋疑只是用幄

帝覆護者古人稱牡丹為木芍藥白居易有詩云上張
幕屋瓦豈亦本諸此未審是否更乞考正之 右再拜
藁慎獨先生坐下

沈仲說與叔方簡

右頓首拜啓十月望過吳江別業得所惠書者三光景
如過駒隙僻居江村况味寥落東流活活悵望送清晝
耳比日來計體道迪吉右萍梗之暇每懷相從聚首實
迫以歲計未免以淹遲數日須至節前可歸相會有期

已篆書千字文留此多日乞恕臬稽之罪嘗因親戚會
讌為酒所困終日憤憤近者始覺神清尚欲借觀數日
決不為寒具油所浣呵呵

張繡江來往溪上帖

與可頓首一菴長老禪師行長與可二子來往溪上
受恩多矣非諛也有來手札以幼男羽畢姻特有頒貺
開械局脊久之真兩難也客居一轂不可以延長者受
之何顏來价行雨中往復五十里卻之弗容當如何耶

伏几愧忤勉用祇領別思所以報監院衆師德不能一奉狀乞致敬草草伏乞法照與可頓拜

屠性數日不面帖

行草書蠟牋本

性拜啓季實學士心契兄侍史數日不面極切馳情賤足又苦瘡瘍不良于行故不能上謁也老溫筆四枝香匕壺一事副以絲帊聊表微忱得芻笑留不勝幸甚黃山去人已迴未山童此時想已在道旱氣甚高盛庄稼田無大損否病足俟稍瘳即當請見以盡不備性拜啓

七月七日謹空

李彥敏不奉誨益帖

行書

訥頓首再拜仲寶翰學先生不奉誨益已三月餘矣徒切馳情想日來文候起處清適是喜區區守職粗遣惟慮困乏貧民不能應承是務此憂此慮將如之何哉外不煩道者惟冀先生凡可以教我者勿惜批示以匡不逮以慰鄙懷若斯文交情之至不備乙未月既望越五日河南李訥載拜于仲寶先生前

張天雨玄洲帖

行楷書藍紙本

天雨惶恐稽首上啟伯清提舉相公行几再辱書問知
前信已達先記中題赤壁圖并寄仲舉諸作皆未及見
似為守中專之矣特喻玄洲詩荷公假貸之久誠出於
不得已茲承至論媿負何言陳畫二軸元帖奉呈唯雅
命是聽知照既深復何容喙日來賤體以瘡疾作伸吟
偃卧人事俱廢當此時寧有倡騎游燕之事哉雞彈領
惠彌感侍晤伊邇悉圖敘謝不宣天雨稽首上啟

六藝之一錄卷三百九十七

欽定四庫全書

六藝之一錄卷三百九十八

錢唐倪濤撰

歷朝書譜八十八

明賢墨蹟

啓札

宋潛溪與儀靖札

濂端肅再拜奉書儀靖老兄執事濂自丁巳春蒙恩放
歸林下適為舊疾時舉夏秋養疴山中山色泉聲之外
絕所見聞恍若世外人也惟足下相思之切每一念及

輒欲命駕讀曩時所惠書如覲丰神政恐衰力日臻良
晤未可卜也育之過山中云有京口之役是必由仁里
託致一函并近詩數篇土物四種聊以寫心伏冀寒暑
自重不宣九月朔日宋濂端肅奉啓

宋仲珩敬覆札草書

璩敬覆別來數日便覺鄙陋頓生第未知何時可見耳
昨日會令姪叔高還伏審尊候納福為慰潛溪外集望
即授的當人交還幸勿淹滯恐失落難尋也詛楚文何

時可睹遊五洩之興濃甚不知幾時可遂否此亦有定
數耶呵呵燈下草草不能詳盡尚容面既四月三日璫
敬覆

蘇平仲勤荷眷念帖

小行草

伯衡端肅復書李實隱君先生執事羅令至承教勤荷
眷念之厚且審入冬以來起居佳適喜慰不可言書堂
記向具藁奉上正欲求正而不示以一字相可否何見
外也荐辱命不敢固辭謹用寫去適治行念念界畫書

字皆謬皇恐皇恐蓋僕已得告歸省度來春可再到此
爾傳道意有的便率易具此申謝節婦傳就納去三本
向日諸公不曾入板偶因字校正而後為之所以居其
末也伯康友兄來侍并望致意夏童者已同行矣希知
之未間萬冀以時加愛不具伯衡端肅復書

呂志學梁溪奉別帖

敏啓梁溪奉別期吳中相見以盡餘懷因事念念急
迴溪上竟成差池耳嗣爾壽卿來得教帖殊慰馳情古

心老瞿曇至復審起居安穩古心事已諧必詣報區區

亦附問訊曾達否耶

旁注寄壽卿奉去者立字

紙二番轉求行翁相

公隸書必深與介意隨其得意書也丁寧寫為賤名庶免被它豪奪之故藏葺成幀亦拜尊意復蒙裝潢陋容就得付文則兄來極感盛德可用外封幸甚天氣晴爽連望杖屨來溪上就去義興何為竟不行耶文則兄還謹勒此草率不悉呂敏奉書惟明教授先生契家足下

十月四日

桂石傳教札甚慰帖 行草書

彥良奉復則賢茂異賢友士安來承教帖甚慰且知雅
況之詳何日復得聚首以寫鄙懷前者匆匆叙謝拙作
恐未盡意幸勿示人也其弟歸聊此答之不宣正月廿
五日桂彥良敬奉

盧公武教游陽羨帖

熊端肅奉書方厓長老禪席自經涉患難遂不相見近
知教游陽羨山中法候清勝吳中董惟宣先生僕之故

交與公路乃同年友也攜古本禊帖訪舊就謁坐下萬
望以平昔好義之心凡百汲引而吹噓之實至幸也義
谿老師雖未識面尤冀引忱申意善權通公向曾一會
想住山如舊欲躡屩去看園碑未有緣在如有墨本或
鈔本見教至妙勿勿不盡鄙懷尚祈葆練不備盧熊端
肅奉書

王泉坡奉秉彞札行書

王英端肅書奉秉彞侍郎學士先生閣下蔡御史還京

嘗草草奉狀申謝并致意閣中內翰諸老而僕之私心
猶未能頃刻而忘南行承贈以言與內相曹先生遠餞
城東篤於斯文朋友之誼過厚如此況遠別千里不接
言論不覲顏色如之何不惓惓於左右也僕居此碌碌
庸庸凡百尚賴示教去年秋及冬此地少雪禱於神臘
月初大雪二日今年正月十二十三至十五日連得大
雪土壤沃潤宿麥滋長米價不穹人皆和悅此先生所
喜聞者敢以報及春暄惟起居清泰恩寵加厚深慰下

懷無由參侍專奉此申悃簡率不恭伏冀亮察不具英
端肅正月二十日

文宗儒與匏菴札

楷書
文氏一門次後

兩辱手誨慰唁諄懃足見不忘鄙猥也所諭云云僕非
真高世者特是衰病侵尋而一向又繫放棄人數即無
可出之理兼以懶廢日久就令可出亦豈能復供世事
坐是雖雅意勤渠而區區此心日益灰喪終恐有孤故
人之望耳前杜生去曾奉數字亦略及此意而不能悉

今再申此想能深察也即日伏承日用輕安眷聚康慶
開懌無量前者曾說寄示小詞而此度却不見及併向
時所許諸詩竟亦付之渺茫豈政事有以奪之耶抑遂
忘之耶呵呵史明古墓文渠家累次託僕致意且方俟
此以為復土之期不知公亦嘗念及否也千萬作急寄
付以慰其子弟之望曹守廉明仁恕真吳民之福恐公
欲知漫此附告未及參承伏紙不勝惓惓惟萬萬若時
自愛以副朝野之望不宣十一月望日年弟文林再拜

奉書鮑菴少宰先生年兄執事 謹空後

文徵仲與貫泉札

行楷書

適來謁謝鈴階值車馬榮出不獲一望履約甚用悵失
示觀松雪書雖非真蹟而行筆秀潤亦當時人所贗或
是俞紫芝之筆也寡昧無識漫爾奉覆惟萬萬照察不
悉治生文徵明頓首上覆明府相公貫泉先生侍史

文徵仲與東洋帖

行草書

入春來俗冗酬酢日覺煩擾偶思高齋玉蘭山茶甚開

擬明日奉拜寄跡數日聊以清吾耳目耳先此敢達諸
遲面盡徵明拜東洋賢契

文三橋與中山札

行草書

遠別無以為情小畫一幅聊將薄敬幸笑留萬萬文悅
亦欲南還想不以一人為嫌也陸平泉抄書幸與飯食
餘事不可托者併乞知之文悅不欲擾厨傳也草草不
盡彭頓首中山工部尊兄先生

文三橋與高陽札

行書

昨承珍餽多感但遠來恐是贗本耳午間試嘗當再報也一笑一笑園顙昨在小兒處遣人送上不意尚爾未達悚仄悚仄改機將欲自用未得如命奈何奈何近來手頭稍寬便欲服飾鮮美吳人故態勿怪勿怪彭顙首高陽大兄

文三橋與墨林十九札俱行草書

雲麾將軍有二種一是李思訓一是李昭道娑羅樹碑舍弟有一本今亦不知在否區區舊有一本是宋搨者

向已模糊至不可識認亦甚難得佳本也適承時魚之惠飲次珍感尚容面謝不一彭頓首墨林尊兄

馬遠紙上者絕少此幅若在絹上當更見筆力其人物似亦非張可觀所能到後臣馬遠三字寫得甚好若偽物不敢如此寫也且題識甚多而皆名人可愛惟楊仲弘詩不見不知何故樓觀前一幅西湖圖後一幅弄潮圖雖無題識亦是名筆草草奉復尚容面悉彭頓首墨林尊兄

此漢時得天馬以銅範其形制作精古但無所用之耳
彭復墨林尊兄

竹林對奕妙甚且王席帽陶南村錢曲江皆名人可愛
可愛但吾兄不知奕旨恐未深識其趣耳一笑一笑其
元人卷魏公筆亦精妙伯溫太樸皆以四體而吳孟思
趙期頤之篆亦表表者柯九思康里子山皆可觀但李
存及解搢紳欠佳耳草草奉復不能盡彭頓首墨林尊
兄

此吳中名畫舊傳畜之必有灾禍已燬於火而南濠寓意錄云已賣與他方人雖家君亦不曾見區區只見臨本而已彭復墨林尊兄

二卷價雖高而皆名筆補之梅花尤吳中所慕者收之不為過也所謂自適其樂何待人言一笑一笑白粲之惠珍感珍感彭頓首

四十之數亦非少初本意緣本主不定耳今以物往可有成云之理亦少初要成交故也五月亦無不可謹此

奉復彭頓首墨林尊兄

此原是黃茂夫者前面畫一枝枯樹其賦字如十二帖
中最小者其紙如雪原價十六兩但不記後有何人跋
耳彭敬復

四體千文佳甚若分作四本每本可值十兩其文賦因
紙欠佳故行筆澁滯耳雖非佳品然亦可刻者也明後
日詣宅賞閱也草草奉復不次彭頓首墨林尊兄

千文佳甚惜烏絲欠妙耳謹妙明日送表或得造宅一

面也彭復

此范蘭室所藏也筆法高古全學李北海早間因吾兄
無簡見及戲為謾語以復耳一笑一笑少間面盡彭頓
首墨林尊兄

文賦舊所見者不知尊意以為何如少間欲赴馬春江
之招當詣一面不悉彭敬復墨林尊兄

中峰簡是率然所書此則用意耳古人之筆大概以簡
帖為勝者以其不經意中耳文敏書要如此卷長篇者

亦少不在題跋之有無也大抵古人佳卷不甚經意留
在人家所以只有題名者甚多彭敬復

適有人持蔡君謨茶錄在此能枉駕過此一看否彭頓
首墨林尊兄先生

杭人有回者得題目千萬見示朝來頭瘡復熾不能走
謁家君近日所書千文付來一看不盡彭白事墨林尊
兄

維摩問疾已領定磔區區所愛未得如命奈何銅盆完

壁幸亮萬萬彭頓首墨林尊兄執事

適賣研許生持舊研十許并右軍思想帖後有松雪跋
尾在敝寓屈過一賞幸即命駕和仲并望同來拱候拱
候廿六日彭頓首墨林尊兄大雅

三卷皆佳品但袁靜春墓志當是顧謹中書黃文獻不
能為也彭敬復墨林尊兄 其篆額類吾子行不然吳
孟思也彭又白

此竹只元人耳非文同筆也其上題詩亦類梅道人恐

梅道人臨與可亦未可知也草草奉復不次彭頓首墨
林尊兄

文三橋與叔寶札行草書

冊葉四幅煩作淺絳色畫如大癡叔明筆法可也須今
日為我動手有急用故耳切懇切懇彭再拜叔寶老弟
文三橋詩經札行草書

詩經曾為我料理否幸留意兩日有興於此書耳干瀆
勿罪仲冬廿一日彭敬啟達言之尊兄几下外白銀

四錢五分欲易九成銀一用幸就付與專待專待

文休承與東浦札

行書

連日緣妻祖母棄世馴鷺命僕治喪事四五日弗得歸
昨晚還家始讀教言并領工食諸物今明日即當具上
耳唐詩第六十卷家下偶然缺此城中友人家此書亦
多容午後借得却送去也人還先此奉復餘便別懇嘉
頓首東浦先生 須溪集甚艱得家間止有半冊今亦
無處檢尋餘書不知可遲得幾日否

文五峰與世重札 行書

香稻米壹斗奉嘗乞收入春欠精再加幾杵為妙伯仁
稽首頓首世重老兄

文開雲與凡夫札 行草書

辱吾兄過愛雅意稠疊何以克當昨又叨擾不負佳期
古人云四美難并吾儕兼有之曷勝暢暢所委畫扇筆
硯未滌俟晚間課上不一一肇社頓首復凡夫四兄至
厚足下 承惠帽匣領次容面謝又拜 力四分

文子悱與罄翁札 行書

累辱厚誼殊感感承諭家書謹送去乞親付行人因有
要緊書在內萬勿使悞至囑至囑弟婦已於廿六日分
免得一男不舉今體中已稍愈矣知存記故敢附聞不
悉小弟發頓首罄翁尊丈先生愛厚下廿九日

文懋光與凡夫札

前因天色將暝迫於歸舟不得飮聆塵屑良用耿耿所
懇孝女挽章曾一構思否無端

下有而字塗去

冀獲雙璧亦不

揣之甚或以孝感不厭其瀆也賤累一扇乞尊夫人大
揮并勿金玉望望教下懋光頓首凡夫道兄先生記室

文虹光與靈均札 行書

春間擬過山齋一候闔宅興居而弟世中人未免為俗
冗碌碌不果可勝浩歎每想足下高居巖壑吸霧餐雲
不識從何劫修來欣羨欣羨友人俞養甫托弟轉懇尊
君大筆三紙幸即揮付愧無籠鵝之報奈何臨楮惶悚
眷弟文虹光頓首靈均妹丈大人至誼

文謙光與靈均札行書

久不晤馳想馳想郡廟建文昌閣家叔已作疏矣求尊
公題前乞致意即揮之若無暇即求尊書落尊公款可
也此係功德事幸即付來手至感至感餘容晤悉眷弟
謙光頓首靈均姊丈大人 奎宿騰輝

文湛持吳門交臂札

行書紅絲闌箋本

吳門交臂相失不勝悵快嗣後弟為功令所迫黽勉就
道則歲云暮矣且欲取道金陵一晤家孟長遂無能於

維揚上謁適接手教知台翁相念慇懃如爾感可知也
從來官以人重地以官清處脂不潤酌泉彌廉古固有
之今乃復見於台翁矣釐奸裕商以足國用則又能臣
作用當不徒以潔已著聲已也第入都甫旬即遘重疾
幸而獲起扶病入闈竣事又幸而所收者大半皆名下
顧殿試則皆不與前列想為座師所累耳仲展名家高
才揣摩三年亦復寂寂當亦以座師故要之不滿達人
一笑也干戈遍於海內水火角於朝端令有志之士無

處生活況生平不合時宜如弟者耶本無進心又無退
計豈惟小草乃類觸藩青山白雲何所不可自老而自
纏自縛如此哉此則不免達人之笑者也散局清涼懸
魚塵釜未足為喻感雅意之惓惓未能以子墨頌矣肅
言附謝不盡微悰新刻硃卷奉覽第名正肅冲

文湛持與眉公札

猶記吳山邂逅今且踰二年矣每聞道駕至金閶相尋
輒已後期杜門益深潦倒成癖台翁胸中當不復有此

顏情人矣適有龍樹菴僧濟川欲勒圓覺經入石謂不
得陳先生壓卷則流傳不勝特丐不肖一言為請龍樹
在江楓蓮涇之間為敝地淨居之冠詳具受之太史所
撰記中非悠悠漫僧也坡公素不甚作楷書而手書圓
覺精嚴妙好千秋煥然倘可援此例懇台翁首肯乎將
見龍樹之名借陳先生永傳不獨法輪生輝而已臨楮
翹企未盡欲言晚弟震孟頓首上眉公先生教下 左
砵

文湛持與凡翁札

紅絲闌箋本

弟於沈先生素附於臭味之末豈敢有所差池但春間
元音丈於弟界上立官路木牌因累土成甬道稍於理
不甚順故不能無言耳然亦僅於弟界中去其新土而
止未嘗有削於舊也今俟其來一憑丈處分可矣前不
知沈先生數日在山中故失於覓晤頃至松陵欲訪其
喬梓舟人謂橋有壩迷失道而止復東中并乞道此意
也附復不盡教下小弟震孟頓首頓首凡翁道丈先生

侍史

文湛持與凡夫三札

往索通譜云無處尋覓昨更囑之不知有以復命否也
四傳四冊欲煩工人一裝乞尊使付之并以微值往不
知已勾無也此公處曾相聞否似不應太遲又不審彼
中消息復何如此中如井底蛙略無所聞有聞希詳示
之考遺才已在句容陽羨遂成幻矣壺公須別作指揮
震孟頓首頓首凡夫道丈先生

來契來論一一領悉俟其來當有以應之奉復也早間
有一字相聞想已到矣晤期不遠統須面盡不一一教
下小弟震孟頓首頓首凡夫道丈先生

文彥可與文蔚札

高賢辱臨不能以粗糲作半日淹留措大無所施其面
目汪汪萬頃使人意消一種傾注至今不去於懷鄧尉
梅花如雪春王青翰北來相攜蠟屐湖山景色與名士
風流映帶成一段佳話望望陳厚甫過貴邑附致八行

奏起居厚甫藝人溫然有君子風宜先生深加盼矚也
渠亦感佩甚切從簡頓首再拜文蔚世丈先生詞壇

先學正草書一幅舊墨二笏香合一枚梅盃二箇伴函

沈石田與徵明札

行楷紅綠闌箋

昨承降兼辱厚賜深愧受之不當適盛使至專此奉謝
所索拙筆在一兩日間已完色矣有言欲告期在後日
一會勿悞勿悞沈周

沈石田與少宰札

行楷書

冷庵泊黃汝安約先詣宅拜送緣書事有未足遂遲失
二公得罪因汝和至故奉達不宜沈周再拜少宰先生
閣下

錢孔周與陽湖札

行書

芸叢館晉卿知公先意及之矣但令親尚寓其地不能
進跡以亡親今永卿已膺徐氏之聘明公可以為之圖
矣晉卿昨與草庭偕來勅僕傳命竊思晉卿公門厚士
何以鄙陋為重輕適以其表達之令罷而晉卿復來僕

嫌其太急渠云家口熬熬藉此待耕芸至富室館舍一
虛謀之如市且今有挾勢以要求者不早為所恐竟為
其所奪耳晉卿情衷迫切仰祈垂體同愛頓首頓首陽
湖先生大人

徐昌穀與惟修札

行楷

自徐州別後消息兩絕始從楚回乃聞執事領安吉相
去二百里許不能為故人具扁舟俗況可知也友人朱
存理老詩人也室貧如磬二喪不舉茲來湖欲求一謁

徑申小東以罄區區冬盡趨朝當迎謁道左餘不縷縷
年生徐楨卿頓首惟修太守先生下吏四月廿二日東

徐昌穀與仁渠札

行草書

隸釋第六冊自廿二卷至廿七卷者不知在君處或在
性甫可作東往取之付叔英抄完極荷令嗣小恙無虞
否楨卿頓首仁渠老兄

李夢弼與鶴松札

寓南都年生李廷相頓首鶴松張年兄大人先生臺次

不肖南行滿擬與年兄一會不意不果至今耿耿人來
承惠翰教足仞不遺雅愛中間蒙示老父思念不肖一
節不肖讀之不覺涕淚交下也蓋老父母止有不肖一
子不肖又別無一子弟可以侍養南北睽違何日是了
以此歸志甚決曾有疏乞身又不蒙允許將奈之何耶
恃年兄三十年之愛輒敢布之亮必有以教我也有人回
草草奉復兼伸鄙悃匆冗不能盡所欲言伏惟照亮不
具二月十二日寓南都廷相拜啓 使南稿一帙奉覽

左素

王濟之與礪菴四札

行草書

鰲頓首自得告還蘇未有一字詞問左右舊患肺疾比復何如故鄉風土宜人當不藥而肥矣甚慰甚慰僕多病早衰近以修書日朝退赴館過午乃歸疲繭不能堪又未能引去奈何奈何聞全卿無事不入城理正當爾然則在家相會恐亦甚少也舊歲小兒似貽乃岳之憂今年忽改行且學作文字矣得一嚴師督之寸步不出

門也地遠南北不能以時修敬乃復蒙時賜及甚愧甚愧薄幣一端少布遠懷餘惟倍萬自愛不復具鑒再拜礪菴黃門親家先生閣下

得二月十五日書承到官起居住安眷聚清吉豈勝慰浣僕此百凡粗遣但舊苦脾胃不和日來轉甚人事殆廢故懷仰惟勤啟問殊簡亦惟亮之兒向近頗棄舊弄漸知好學但性魯劣未獲寸進幸時賜督教之庶平生知愛之意南京無朝謁之勞有山水之適高興所至不

惜示及亦足以想見宦署之況若所下問者則平生抱負當必有異於人者僕何足以言之未由瞻奉惟萬萬自愛不具鑒頓首礪菴黃門先生親家執事

南來甚煩執事沈才美還始克裁謝疎懶之過也計考滿不遠不知何日北轅日瞻望也辱手教豈勝慰浣其始末不及知得通報數語疾讀為快此亦天下之公義也但人不肯為耳此後則望少徐之然此非僕所當言也樊京兆之語此僕素行不能信於人甚愧甚愧然僕

平生之心執事其以為何如哉此不敢為它人道也亦以竢知者耳然浮議不形於下而獨出於勢位之口則僕宜無愧焉耳置之不足道也語及故復爾匏菴進少天官斯文鄉里之光想同之也方震行急燈下作報甚草草懷不能究惟自愛鑒再拜礪菴黃門先生親家閣下

有鹿角三四具在此未知修煉之法欲煩盛价過此指點頑童不知何日得暇幸撥冗是禱陳久者亦可用否

乎鑿再拜礪菴中丞尊親家先生閣下

居士貞與葦川札

行草書

頃承過臨慢去愧罪日來滿意文候鳳山因足痛未復

兒輩

文

所者而內外俗事紛擾日無暇時遂爾因仍每

或念及未嘗不面赧汗流也因感荷鳳山雅存而未獲

少報萬一耳僕固庸碌無一可齒於人繆為時流推愛

而鳳山與僕似有深嫻雖不昌言而心已許之矣連歲

館賓匪曰不良但因豚兒愚戇不承教令人亦何苦而

為僕諄諄雖名為從學實虛度歲月也僕之屬意鳳山
非一日矣去冬不避誚責輒爾吐辭鳳山慨然許允僕
聞語即舉手對天稱慶而交游知者亦為僕喜此非虛
語也詎意思父子丁時不辰復有今日事體可勝感歎
蒙示二帖足多感戴但一帖有微露舍姪之語甚為之
驚駭不識舍姪何以獲罪於鳳山也當詢之負荆兄或
知其槩何吝見教若館事必無可解之理若此字點去脫果
舍姪有罪則鳳山今日之辭似非實病矣悠悠者喜為

浮詞望致意鳳山當勉為僕一行也不日當來相
見同載往黃川一笑何如餘情種種容面悉不一具
第節第頓首奉復葉川長兄先生侍史 禹門兄不及
另柬同此致聲

祝枝山中酒札

行書花箋本

昨中酒矣今日又邀花下耶聞請如聽令固措大家風
不須再促也允明拜復

祝枝山與秋田札

草書

專請今午過舍看種榴樹使此等輩莫敢欺於僕也萬
希勿拒感荷感荷眷生祝允明頓首秋田表弟愛下

祝枝山與子行札

早間承王侍御送紅白江梅二枝特此到宅專借向者
執事所言花餅一用對此先春之景焉能扼其不賞之
意乎若尊肯顧乞降為慰三日祝允明頓首子行表弟
親誼

祝枝山與在野札

明日請過觀畫恐尊他出敢此預期勿拒萬萬眷生祝
允明頓首在野賢妹丈執事

王陽明上父親二札

男守仁百拜父親大人膝下會稽易主薄來得書備審
起居萬福為慰男與妹壻等俱平安但北來邊報甚急
昨兵部得移文調發鳳陽諸處人馬入援遠近人心未
免倉黃男與妹壻只待滿期即發舟而東矣行李須人
照管頑兒輩久不見到令渠買畫絹亦不見寄來長孫

之天骨肉至痛老年懷抱須自寬釋幸祖母康強弟輩
年富將來之福尚可積累道弟近復如何須好調攝母
貽父母兄弟之憂念錢清陳倫之回草草報安小錄一
冊奉覽未能多寄梁太守一冊續附山陰任主簿廿八
日男守仁百拜

父親大人膝下毛推官來 大人早晚起居出入之詳

不勝欣

文闕

弟恙尚未平而祖母桑榆暮

文闕

不能為楊

公所留養病致仕皆未能遂殆亦命之所遭也人臣以

身許國見難而退甚為不可但於時位出處中較量輕重則亦尚有可退之義是以未能忘情不然則亦竭忠盡道極吾心力之可為者死之而已又何依違觀望於此以求必去之路哉昨有一儒生素不相識以書抵男貴以既不能直言切諫而又不能去坐視亂亡不知執事今日之仕為貧乎為道乎不早自決將舉平生而盡棄異日雖悔亦何所及等語讀之良自愧歎交遊之中往往有以此意相諷者皆由平日不務積德而徒竊虛

名遂致今日士夫不考其實而謬相指目適又當此進退兩難之地終將何以答之反已自度此殆欺世盜名之報易所謂負且乘致寇至者也近旬及山東盜賊奔突往來不常河南新失大將賊勢愈張邊軍久居內地疲頓懈弛皆無鬪志且有怨言邊將亦無如之何兼多疾疫又乏糧餉府庫外內空竭朝廷費出日新月盛養子番僧伶人優婦居禁中以千數計皆錦衣玉食近又為養子蓋造王府番僧崇飾塔寺資費不給則索之勲

臣之家索之戚里之家索之中貴之家又帥養子之屬
遍搜各監內臣所蓄積又索之皇太后又使人請太后
出飲與諸優雜劇求賞或使人給太后出遊而密遣人
入太后宮檢所有盡取之太后欲還宮令宮門毋納固
索錢若干然後放入太后悲咽不自勝復不得哭又數
數遣人請太后為左右所持不敢不至至即求厚賞不
已或時賂左右間得免請為幸宮苑內外鼓噪火炮之
聲晝夜不絕惟大風雨或疾病乃稍息一日二日臣民

視聽習熟今亦不甚駭異永齋用事勢漸難測一門二伯兩都督都指揮指揮十數千百戶數十甲第墳園店舍京城之外連亘數里城中三十餘處處門面動以百計谷馬諸家亦皆稱是榱桷相望宮室土木之盛古未有也大臣趨承奔走漸復如劉瑾時事其深奸老猾甚於賊瑾而歸怨於上市恩於下尚未知其志之所存終將何如春間黃河忽清者三日霸州諸處一日動地十二次各省來奏山崩地動星隕災變者日日而有十

三省惟吾浙與南直隸無盜近聞

缺

中諸兵頗黠桀按

兵不動似有乘弊之謀而各邊謀將又皆頓留內地不得歸守疆場是皆有非人謀所能及者七妹已到此初見悲咽者久之數日來喜極病亦頓減顏色遂平復大抵皆因思念鄉土欲見父母兄弟而不可得遂致如此本身却無他疾兼聞男有南圖不久當得同歸又甚喜其恙想可勿藥而愈矣又喜近復懷妊當在八月間曰仁考滿在六月間曰仁以盜賊難為之故深思脫離州

事但欲改正京職則又可惜虛却三年厯俸欲遷陞則
又覺年資尚淺待渠考滿後徐圖之曰仁決意求南此
見亦誠是男若得改南都當遂與之同行矣遂菴近日
亦苦求退事勢亦有不得不然蓋張已盛極決無不敗
之理而遂之始進實由張引覆轍可鑒能無寒心乎中
間男亦有難言者如啞子見鬼不能為傍人道得但自
疑怖耳西涯諸老向為瑾賊立碑槌磨未了今又頌張
德功畧無愧恥雖遂老亦不免禁中養子及小近習與

大近習交構已成禍變之興旦夕叵測但得渡江而南
始復是自家首領耳時事到此亦是氣數家中凡百皆
宜預為退藏之計第輩可使讀書學道親農圃朴實之
事一應市囂虛詐之徒勿使與接親近忠信恬淡之賢
變化氣習專以積善養福為務退步讓人為心未知三
四十年間天下事又當何如也凡男所言皆是實落見
得如此異時分毫走作不得不比書生據紙上陳迹騰
口漫說今時人亦見得及但信不及耳餘姚事亦須早

區畫大人決不須避嫌但信自己惻怛心平直心退步
心當時了却此最脫洒牽纏不果中間亦生病痛歸侍
雖漸可期而歸途尚爾難必翹首天南不勝瞻戀男守
仁拜書 外山巾及包頭二封

王陽明與弟伯顯二札

行書

比聞吾弟身體極羸弱不勝憂念此非獨大人日夜所
悵惶雖親朋故舊亦莫不以是為慮也弟既有志聖賢
之學懲忿窒慾是工夫最緊要處若世俗一種縱欲忘

生之事已應弟所決不為矣何迺亦至於此念汝未婚之前亦自多病此殆未必盡如時俗所疑疾病之來雖聖賢亦有所不免豈可以此專咎吾弟然在今日却須加倍將養日充日茂庶見學問之力果與尋常不同吾固自知吾弟之心弟亦當體吾意毋為俗輩所指議乃於吾道有光也不久吾亦且歸陽明當攜弟輩入山讀書講學旬日始一歸省因得完養精神薰陶德性縱有沈疴亦當不藥自愈今未能一日而遂言之徒有惘然

未知吾弟兄終能有此福分否也來成去草草念之念
之長兄陽明居士書致伯顯賢弟收看

此間事汝九兄能道不欲瑣瑣所深念者為汝資質雖
美而習氣未消除趣向雖端而德性未堅定故每得汝
書既為之喜而復為之憂蓋喜其識見之明敏真若珠
之走盤而憂其舊染之習熟或如水之赴壑也汝念及
此自當日嚴日畏決能不負師友屬望之厚矣此間新
添三四友皆質性不凡每見尚謙談汝輒嘖嘖稱嘆汝

將何以副之乎勉之勉之聞汝身甚羸弱養德養身只是一事但能清心寡慾則心氣自當和平精神自當完固矣餘非筆所能悉陽明山人書寄十弟伯顯收看印官與正憲讀書早晚須加誘掖獎勵庶有所興起耳

六藝之一錄卷三百九十八

欽定四庫全書

六藝之一錄卷三百九十九

錢唐倪濤撰

歷朝書譜八十九

明賢墨蹟 啟札

王雅宜與五嶽札

行草書

僕聞溧水無輜可顧今日發舟已江行矣專此奉約幸
早命駕侍弟王寵頓首五嶽尊先生執事

王雅宜與子重札

行草書

石湖風景頗佳蘆荻漁舫點綴秋色足下何不拉徵仲
丈過我况菱角雞頭可供也一笑王寵頓首拜子重社
兄

王雅宜嚮者札

草書藍箋

嚮者玄墓之行知減等官至不曾來相約山水佳勝處
每恨吾弟不同遊也尊事竟何如承遠惠多品甚荷多
謝令祖隱君山中風景殊佳幾時能至耶懸冀懸冀寵
頓首

王雅宜即刻渡江札草書

即刻渡江囊空痴重故不能如命耳奈何奈何此復寵
頓首

張玉溪方塘翁帖

行書藍絲闌雲邊紙本

方塘翁使人齎賜執事疏草謬及不才何德以承之况
賢俊滿朝日侍寵光何有於山林疎拙孤遠一鄙人哉
恐負知愛亦不敢不自守為知己辱也歲時強半在山
入秋稼獲妻孥得飽饘粥明公之惠亦厚矣又何敢有

他冀便中草草裁謝不能顯人亮原幸甚不具七月十日潮再拜

都玄敬與存禮札

行草書

使節道蘇偶以遠出不得一面殊為悵悵所云石鼓文等因與李後主墨竹及他碑帖等物同典其銀頗多一時不能取贖明年夏間欲將鼓文翻刻搨以傳世此亦存禮之志也武氏祠堂畫像僕有其_缺字刻已及之但急欲秘藏者錄本一校對耳雁塔題名乃金薤中不可

少者如欲留原本乞次第其歲月名氏急錄寄示幸甚
幸甚漢度尚魏夫子廟二碑及金薤一冊奉將遠意苦
寒惟以道自愛蜡月廿三日穆拜手存禮吏部大人老
弟侍右 施子中收碑銀四兩餘二兩納去彼云碑不
用原價可索也燈下目昏作字潦草恕之 餘素

張補之與宮翰帖

侍生張袞頓首頓首宮翰與槐老先生鄉望秋中東坦
至乃承教劄雅念惓惓何以堪之感戢感戢伏讀尊翁

遺稿琅琅大雅之音實東吳第一名家惜衮小子未之
及見也東橋公誌銘足以發揚其傳必矣南畿典試滿
擬便歸故里得接言笑何以獨辭此勞有懷欲吐惟空
馳想而已飄泊賤資白髮種種迴思昨事真如夢中不
盡不盡 石城先生會間乞呼賤名上覆十月七日衮
再拜 餘素

楊介夫長小兒札行書

長小兒因食後冒風停滯未消後食生冷過多昨日及

今日作瀉前後共四五次乞斟酌賜煎劑一服或丸劑一二服區區馬舍弟騎出不及躬造不罪不罪廷和再拜陳大人先生國手 藥金一錢

許元復去歲札行草書

去歲華札盛情雖嘗具謝然曷以罄報德萬一竊深銘刻而已鶴梁歸時即審起居強勝尊嫂子舍令孫皆清吉為喜諸兄有書見及者鶴梁至淮被劫去竟莫知書中有何願聞者悵快奈何小弟自去年夏秋患痰火困

鬱無聊今春復發疥癩日夕爬搔畏出門戶北往之計
茫然可嗟將以敝廬付人則家小何所安頓欲貸則無
主欲買則無物雖頗安命如負故人知己之望何小川
久不能出方欲勉酬老先生美意強行何期新例適嚴
禁革關文買舟不貲益算不就且作遲局矣篠澳報雖
闕久尚又緩於乃兄也屈指故舊時復彫殘若玄洲兄
以去年三月抵潯州不半載即病淹滯至今春二月十
八日捐祿可傷也嗣子隨任尚稚其僕信來四月間纔

起程水陸南北未定家具粗重封鎖後堂樓庫者其次
弟久已窺伺今悉分取所有南宅四官之子名雖立嗣
亦不得專所分者十無一二訃音纔至而頃刻已罄然
蓋有嫉立嗣者縱橫其間乃至於此鶴梁能言之也以
玄洲之存心制行豈應若是官通私負多不可言所存
大宅計亦難支立嗣者亦虛名耳可悼可憐可憐
兄在知厚漫一及之里中諸故舊承念者皆安尤可喜
者王玄靜以六月十九日寅時側出一子云頗奇偉可

為履吉有孫之慶衡翁愈健亦見玄孫矣明冬九十可
無詩寄賀耶小弟向年出京伏蒙老嫂以蘭竹便面書
女史箴賜荆婦荆婦村俗不敢忽易揮展況上有許
夫人之稱愚見謂至寶鄭重宜付之得人嘗聞許少華
老先生夫人識字解文義因少華公寓京時加惠於僕
甚渥遂以此為獻取姓之相符爾公得扇感甚而又夫
人之逝遂成一詩遠寄來謝初已答云必錄以獻吾兄
嫂以見識者自知所重永傳為一佳話也列於別紙願

一鑒之或有興作一詩寄少華公亦妙此間陝客時有便也左右新有所聞不惜隨筆記示無庸拘文成段為妙中元之日初弟頓首浮邱老長兄先生知厚

徐伯臣與子元札

行草

湖行彌月未得謁弔近因令叔事將謁宜菴先生併可見足下也昨見令叔甚潦倒腰疼脚軟不得行坐其狀可憐足下何不仰勸使得寧家調理以安暮年想其心亦非好外遊者足下圖之尊堂小像已成謹奉去想足

下日來孝思深切得無傷情否古人以理制情自是至
論幸多思之何叔毗近篤疾入死路者再其內人宋氏
誓守貞願死夫前使得見心此亦人間大奇事何子道
義行於妻子此亦可見因併奉知友生徐獻忠再拜子
元孝子足下

錢君輔承愛帖行草書

侍愛生錢師周頓首拜啟上承愛踰骨肉諄復款曲非
語言所能盡第無似駕劣有孤尊意雖出處之際有不

在我者每念道懷自是芒背不能帖席耳敗北時誠有
小就之意為諸家力阻遂爾改圖緣小道未通姑寓海
印寺因勵抵圖再奮強顏與士輩頡頏但恐力委氣屈
爾君所托僕再四熟籌乃得良策然亦陳於高明惟高
明圖之舊事去留惟君一決新畬惟謝子可托僕已道
意更不勞費惟是首肯如僕計老文自能勾當僕非不
欲為犬馬報君自揣非其人則又不敢強力任重以貽
有道之羞僕非推避當諒小子拳拳不得已之懷不如

是不足以為報効之道則能諒僕心曲得出入門下矣
南人歸促燈下草草不盡俟四僕回更有細談但四僕
乞峻拒不為毫髮所誑則愛僕者多矣至囑至囑季夏
望後師周頓首

何元朗春中東歸札行草書

春中東歸談晤洽日殊快殊快但別後回首更增悵惘
耳聞邑中長吏得罪巨室此華亭數百生靈含冤地下
實天假之手耳而吾鄉縉紳動輒欲邀長厚之名更無

有正言以聲其罪者坐視桑梓之民並為魚肉何太無
香火之情耶可歎可歎可歎可歎平老數有直氣想必
有說也側耳以俟佳報茲小僕歸聊付一耗冬米一担
少致遠意唯照入幸甚郡中近事不靳示知至望眷生
何良俊頓首紫岡兄長先生大人門下

何叔皮與長谷札

良傳頓首長谷兄侍下臨行辱至意勤渠極荷骨肉之
情僕自十五日分袂廿一日至丹徒已附徽州胡主事

舟行矣一入風塵殊便鞅掌始知烟霞為真相邱壑為
仙區也承惠佳篇實領至教必不沈溺以負初心使淮
南招隱徒勤而北山移文復作也城南新社已結清緣
尚賴足下綜理其事以俟僕南歸耳前與議僕奉貞孝
君事此區區畢志死亦異議者承足下亦謂為當理僕
特不能負貞孝於幽冥耳如欲沽名有如此日但恐家
父兒女情多僕去後將有別議僕歸必不能奉命者老
兄托在骨肉煩一東下細議此事已承見許敢此復申

幸不負遙望故鄉不勝戀戀水東西谷臨行促不及走
別相見煩一道意良傳頓首再拜闕數不盡言言不盡
意

陳白陽與東浦札

行草書藍牋

適朱生來接執事廿八日書展誦之餘足見親愛昨日
小孫周歲城中無一字及老夫不知乃屈執事失陪惶
恐曾有俚鄙四句寄我小孫想發一笑過矣乘便草草
比為塵土作癢洗浴作微疾未得參候快快餘容面悉

不具旦晚將束裝為城居計已經宅後當一揖而去也
十月二日淳頓首東浦尊契兄親家執事 聞朱生云
昆玉皆要香橙樹當如命須早來也

陳白陽月餘札

行草書

月餘不奉面馳情昨過大姚見希徵弟知貴體違和殊
驚駭茲遣童子奉疾想當勿樂若已康勝幸即就便舟
一來有事在此傍皇不能果決須君來定奪倘未安亦
不敢強也伏乞裁照萬萬十八日道復頓首野朴契厚

先生執事 餘空

陳白陽秋來札

秋來忽忽渴欲一見無緣也朱生向造宅已嘗道尊意
蓋已領之矣涼篷一節多承費心但遣匠人為規畫則
又過厚矣恐不當如此但得假小杉木數莖足矣旦晚
尚令朱生詣前耳金氏作弔近已行矣若必欲奉陪所
不辭也餘容面謝蕩事如此蹭蹬則我之行計又未可
必行止非人所能有弗信矣一笑一笑非吾兄介意更

仰之於何人耶子齡舍姪在宅否相見當道此情不具
七月望日淳頓首東浦尊親家先生契兄

陳白陽閒事札

僕近以閒事到松陵返棹時經宅前願一登拜計南行
未還中止茲得手教知尚未發始覺會晤之不偶為之
悵然老太太人何恙今既佳慰慰僕行固未就而棲止
亦未安欲結一巢以蔽弱雛而後長往而百無一備奈
何奈何承謂塵坐不入戶文墨日相親正未然耳負媿

負媿聞行期在十五乘此佳節汎汎於江月之下直欲
登仙也欣羨東浦圖奉上細閱殊不佳玉池圖當辦還
僕欲附一事於南明後日或面慊也不具十一日淳頓
首東浦尊契丈親家先生 向辱賜未謝尚容

馮子仁與孫內翰札

行書

高才博學如黃山谷尚云讀禮記月令篇然後能解子
美過時如發口句恩顧教齋何能為役而敢妄肆詆訶
此所以不能贊一言也恕責恕責愚意硃筆前點四字

後直一句皆決不可去者不知於尊意如何耳使回草
草奉復不宣備內翰孫年丈先生執事 女帶一束連
匣付去人糖霜之拜感感恩又拜

口用與罄室札行書

屢辱手教仰荷拳拳非鄙人所敢當也高陽書中言兄
有書未至想有待耶貧谷數蒙惠顧區區微以尊意諷
之久不為此矣近時亦稍及之但不似曩時之甚耳公
事之暇輒留心古董此中頗有所得入多出少亦足喜

也聞令郎長成學業大進復得良士為甥舅畢姻想在
邇耶區區碌碌如昨惟懷抱甚適貧賤憂戚之事舉不
足以動其心所以目疾雖不減亦不增所托求石屋明
目方乞即致之真大惠也隆池正齋俱赴軍門之招建
功立業得此機會吾輩株守殊為可笑毛石壁在此以
詩酒自娛甚為儕類敬重此亦壯遊之助區區荷其雅
愛尤深故漫及之章美鐵筆甚精質谷頗得其力三橋
在此三公而下無不倒屣迎之且古玩山積資斧日增

今歲准得嘉禾之選矣陸玄洲之恙想已平復暇中不
惜示慰龍門海洲聞日夕聚首遙想高興數數飛夢虎
邱石湖之間而探囊羞澁不能長往奈何奈何玄洲書
至適在西內拾紙作此不能一一用頓首再拜上罄室
老先生大人閣下

口修與罄室札

向晚奉期不能踐約即刻有河豚屈過共享不敢負盟
耳幸移玉萬萬米生望帶來有小事一勞也舍甥扇想

辱揮染并希袖過極感極感五日修頓首頓首罄室契
兄先生文侍 兼有要言面陳明日去領三山翁之命
恐席間道及何以應之耳修又言 餘

王龍溪與石山札

行草書

侍弟王畿頓首拜石山老兄丈先生道宗下昨偕尚莘
出西水深期得與兄再會悉取請益不意乃舍我而去
豈勝悵然豈勝悵然領尊惠煩轉尊翁東園老先生吾
兄功夫大段已知得力但一念超脫處若猶欠勇未免

以因循為自然恐後之視今或猶今之視昔年與時馳
意與歲邁不可不發深省耳弟別去不敢負知愛秋仲
之約千萬弗渝价返附謝不盡所言筭茅一裹附老嫂
見弟婦意五月望日畿再拜 苧村翁物故吾道之傷

王龍淵昨者登堂札 行草書

昨者登堂弔哭無淚可揮自謂海內相知如令尊者有
幾百凡未盡之者皆屬於賢契大槩賢契繼述之大在
於學問一事其間親友交承務在從厚益光尊翁盛德

所問西湖令叔祖之事可悲憑令師體仁裁處毋使破漏中間即未能直遂不須屑屑與園翁令祖知之以全彼此之情方為善繼善述耳昨因同伴相絆不及候面一盡此懷殊怏怏尊翁襄事時或俟過此時定期入晤慰此耿耿使至承書惠拜領草草奉復以謝不盡心期通家生王畿再拜道鄉春元大孝方先生多托致謝所惠例不敢受幸照存又言

王弇州與白川札

行書

年侍生王世貞頓首拜大台柱白川翁老年兄先生大人鈞座下弟自東土獲奉顏色於今十改歲矣伏惟吾丈以不世之才膺殊特之簡撫有東周入衛三輔旂常是勒鼎鉉非遙甚休甚休弟今春匍匐北上為先君子白見冤狀躑躅都門之外半歲而始獲昭雪歸葬之後長奉洒掃兼理漁樵於小人之分已足他非所計也忠菴兄盛德長者亦有疆場之累今聞行勘以吾丈為之代當無復他虞矣茲因舍親俞生行便聊附起居之敬

俞乃文學仲蔚子仲蔚名重吳中與弟契分非常此生
欲畢姻於大同一幕僚不能自達欲求吾丈為給力出
關仍得導騎護至彼地窮途之感不在此生而在弟矣
手記潦草不恭統惟台亮初寒北土猶甚惟冀為道自
玉以膺大眷不宣季冬朔世貞弟頓首再拜

王弇州與仲蔚八札行書

廿五日常河間友生王世貞頓首啟仲蔚尊兄足下春
時附一詩及書知當達也賊益深無復下理貴人悉海

內兵攻之吾恐遂一擲耳仲蔚佳士顧肉作青精氣何
可著賊手吾力不能挽夢寐仙仙耳仲蔚知吳明卿謫
耶坐以談文章故當事者幾一網盡然謂僕乃其魁焉
所深恨僕則以左右死者常自厭恨業障不自割斷借
人了之明歲夏初可長得奉仲蔚也日坐樊籠訊誅滿
案作生平所無態苦甚苦甚武當笋風格領袖質簪昨
過焦副使者雜油及蒜烹之一見欲嘔不覺匿笑此笋
亦當遂笑吾也人去便聊以問仲蔚 佳集頗已徵梓

人第急須管仲長公子贊耳足下不作管贊殊未解所以新詩亦便寄來併刻之徐子與行部吳中首當下榻仲蔚也貞又拜

昨承示徐子與誄適有客不能作答侵晨讀之詳婉懇篤令人神傷蓋不獨其辭之宏麗也近舍弟所寄分書已至後有增定一二條旬日內亦須遣人入雪故不復寄音墓碑成足下亦不必親行但俟百衲碑例量其大小雙鉤廓填入石可也冗次不一一世貞頓首啟仲蔚

尊兄大雅足下

連日苦瘡瘍爬搔甫畢呻吟繼之以故不獲候訊更辱雅貺先及慰藉勤拳感甚感甚僕之此補甚乖夙懷得遂初服快不可言所少恨者家無聲色之奉園池酒食皆與客共而為人生排作韓熙載以此不能忘言耳談及子與便令人酸鼻俟櫬歸即當有茗上之行當約足下同往也舍弟遷江西臬副想所欲聞者餘不一友弟王世貞頓首復仲蔚老兄先生詞伯足下

陰符經信是趙得意筆雖小有刮損不妨白璧已令休
承公瑕作跋更須兄數法語前有佳紙書之可也外紙
三條求以八分書欲刻之紫檀匣并希即付去力圓覺
經六卷可揮灑否易謂姚麟迫欲坡書換羊也世貞頓
首仲蔚老長兄大雅

前得教知苦利未平昨見王明佐道病狀甚悉今夏暑
濕不時脾家積食飲之毒得秋氣輒發宜絕滋味時以
白粥補之香連丸類恐太峻或非高年所宜也僕比飲

啖如昨體中亦無苦似得絕欲之力聊以附聞不一世
貞頓首仲蔚老兄大雅左右

得書知子與兗問詢之使者得其詳必不妄矣嗣息竟
絕二千里旅櫬人理慘酷能不痛傷若僕何足言縱彼
中狂吠不勝病疏已上決不出矣且念子與乃爾中年
以後人何可遠出歸老弇州園與足下時相聞足矣足
矣餘不次世貞頓首復仲蔚尊兄大雅足下

昨復勞神染翰結法古雅之甚明當致之第恐此老見

姜沈慣不便識耳所喻松雪陰符經筆甚佳但跋尾名
姓及收藏前印俱為俗子刮壞而後少六十九字又無
佳跋勉以十金酬之想它人不復爾也足下以為何如
將來正須足下大加賞鑒耳餘不具世貞頓首復仲蔚
尊兄大雅足下

王敬美與仲蔚札

行書

得書欣若面談適早得京報知家兄南都之謗不入與
王龍池俱無恙此誠為世道慶不但僕家事也唯虛江

兄在罷軟之列差為不樂耳愚兄弟素寡宦情今著此
箭誼無復出公論既明進退自由比於勒歸霄壤矣知
足下憂喜當同故不憚詳述也僕書尺牘雖小佳較梓
匠政得勝耳為家兄所強乃作班定遠窮時態可為一
噓得袞可有十二三其意在博採與足下務精之意別
欲稱雅語即古人尚多不滿人意者況唐宋暨時人耶
春日正佳兩園梅花盛發念足下不得共握麈其間有
興能買舟一到否即日世懋稽顙復仲蔚徵君先生大

雅足下

陸平泉龍潭閣札

行書

龍潭閣中憑高外望黃雲遍野秋色可餐擬約來日偕
往一舒眺也此啟眷生陸樹聲頓首拜

錢緒山舟過札

草書

德洪頓首啟昨舟過貴鄉聞執事村居路遠且洪為廣
行期迫城中諸相知俱不通及用是懷歉書院聞林秀
水建制以龍渚可賀可賀劉龍陽天真經度頗悴心力

王禎一議得時便於事或有所濟然必得權借有力乃
可恃耳非執事任之將誰責之龍陽書來執事必有復
也毛梅庄洪亦附去一簡矣行次匆匆布此草草不盡
所請侍弟錢德洪頓首拜石山沈大人先生道契丈
貴鄉諸同志均乞致謝幸幸初八日具餘

莫雲卿與劉生手簡

昨夜坐偶得佳興寫小行書一紙頗有前人法度目中
無知書者第可與足下相賞耳今奉去以償久負行書

欲令運筆不暫留滯痛去俗病自能合作學古本聖教
序不如學新本蘭亭此語大有會心也褚河南筆趣絕
羣離類枯樹賦新絕奇古便與二王抗行願足下留意
焉習舉業倦時不妨游藝此道此道若大成縱橫一時
可令青紫奪氣

項子瞻與三弟六札 行草書

心靜養客中豈真為惡耶贈行詩新年須成冊寄去張
王屋歲暮旅泊無所事亦是為貧驅使向日豪縱竟成

春夢而反奔走干謁何哉昨雪頗有佳興恨歲例俗態
累人不能有會細糖一盒乾腊四肘遣意淇再拜三弟
二官往杭何日還老灶從行否屠尚書房子賣成陸
堂此近為異聞錢海石復報書閒中來看一笑

六朝詩遣還俗輩無可與語且向蘭藉間求良友也病
中不敢抽思無所製作俟晴要仰觀來發一奇興淇拜
三弟

纔到家阻雨峽石二宿但不如雪耳應山在此即來一

談想連日雨孤懷亦不暢且共笑嗟淇拜三弟

今日頗涼爽新竹清陰良可憩談下午相期一過欲要
仰觀恐妨下帷未必肯來虛意不若止也六朝詩十帙
遣歸共前廿帙折處宜以朱點如未錄勿即伸展亦數
日之勞也淇拜三弟

晴霽則苦蒸熱涼爽則苦風雨適意時豈得多耶纔自
鄉還劉鼻去未過一清談何如六朝詩看畢初興欲手
錄目昏竟嬾恐成虛想耳得善書者了此亦嘉事也淇

拜三弟

香餅二十不能多惡况兼之陰寒天道人事無一而可
獨坐則無聊披帙則惘然欲行無地欲語無人何以排
此伊鬱淇白三弟

項子瞻施事札

行草書

施事昨已供上杭有日矣湖山春色當有待也因而得
賞俗累豈真俗哉昨暖南圃稍動此意今又陰寒矣良
辰誠難所遇皆俗陋不可堪處無可共一言者况相契

分者哉唯尚友於簡編嬰情於耕植耳閒過園一坐少
息勞擾淇拜

項子瞻蘭蕙帖

行草書

姚士成蘭蕙蓄得甚少以今計之豈止五分一錢耶用
之當愛重此不足與不知者道也惜哉士成花較昨更
精神因狂飈已有先零者矣榮盛何可久先來烹茶淇
拜

項子瞻惠泉札

行書

惠泉一禪專力遺貯餘俟袖茗過院共相品試直須舌
根上討出本來無味主公方許入曹溪一派項元淇饒
舌定湖慧空二上人

項子瞻與定湖札

行書

適從吳門還為得趙文敏簡中峰帖一冊此書學人不
可無者特此奉具山谷云字中有筆如禪句中有眼須
一毫頭上下工夫始得餘留面賦淇草拜定湖法座

項又新欲坐花前札

行書

極欲坐花前領清話偶以冒寒而止專此辭謝暇刻當
久坐高齋不虛兄念也諒之諒之制教下弟德新稽顙

邢子愿雲破句帖并柬

雲破月駛舟行岸移秦公厥有深指乞作中露一聯
緊切語如此意如何伺頓首

邢子愿與昭甫札

上賓過此不能具酒貲殊愧殊愧今以一扇易得青錢
百文足下持至市上壚頭試與許孟輿共醉也昭甫年

家兄侗頓首

李卓吾客冬札

小楷書

客冬賜俸本為刻書而書藁未定將俸蓋成樂師佛殿一所朔望律僧數輩持誦樂師真經以為諸丈念佛亦不虛也茲正油漆得來賜即告成矣并以附謝李氏四書一冊附此請教近况如此亦可知清福之不易受也餘具認菴書中不敢多及四月廿七日贇生頓首餘

敬

顧同知與後朋札草書

往歲拙作偶見此紙錄一過呈上請教昨小啟請訂一
日少展夙念至望至望衰朽平生所酷好者琴耳嘗刻
譜以傳近欲諸兄之高才雅致者得跋數語以彰區區
一時好尚在此而不在彼如兄超凡穎拔高出流俗萬
萬者可吝此數語以垂愛於不朽耶感刻感刻何如何
如北游仙舟發興未為晚也草草右啟大元後朋契兄
先生契我眷生顧應陽頓首拜

唐元徵與公觀札小行書

別後見邸報知翼菴兄已請告矣凡詮部請告者疏一下即行例無覆也弟以為書可無作昨舍甥道殷丈意謂仍須備一書正與來教同頃當即修一槭附之豈敢誤也弟病體殊不堪不止雨况淒其耳奈何公觀老年丈侍史文獻弟頓首

錢稚文別來札行書

別來想姑娘起居康勝骨肉尊親此時更無多人不能

不懸懸也弟近來所業何事古人士農工商各居一業
村教雖清苦若修業有恒猶勝浮游奔走耳代儀四金
致姑娘充茶果之需轉呈是望諸不一一表兄龍錫頓
首

徐子先壘吹蘿附札

本以壘吹幸從蘿附春月小兒書來伏蒙老親家附從
所請弟與荆人俱不勝感戢弟閏月出都暫駐津門擬
在望前後解維行矣去國之身不能躬陳謝悃欲遣一

介為未見小兒報言未敢造次乃辱台劄先頒且隆儀
優渥既感以愧無能為心小兒書中屢言貧家無以為
禮乃蒙老親家垂神優厚尤為不安耳

缺

之初識者

知有今日即弟通籍之初為當事者陳說亦言當有今
日所以自棄於日月之側嘵嘵多口冀萬一之用乃古
來必然之畫多待禍亂數年而後用第欲以一人之力
欲弭濫觴而遏滔天想造物者或未之許也老親家初
至遽值此念無事任於時稍遷附近何害耶西山中齋

堂一路多有深巖幽谷良田廣宅清泉茂樹可以避世
昨歲頗為都人所物色天氣清和老親家或於彼中覓
一佳處甚善萬萬不宜出東南來也或房山涑水易州
亦有佳山水處可處耳厚賜借將芹意伏惟鑒存容日
專陳微悃不莊不悉弟光啟又頓首上

徐子先夏初札

小行書

夏初一書寄還不知小兒曾展送未也郡幕黃公祖復
得老親家手書兼拜珍穀之賜且媿且感迄今行矣度

抵家時正秋風扶搖鵬搏九萬里之日也弟既未能亟
歸計猶得把臂長安道中耳時局日新甚至典試諸公
久未奉俞計入場期日未免易常期矣他事盡然未知
究竟若何奈何哉感時觸事憂結良深胸中亦有鄙謨
字抑鬱當誰告語唯待來茲言返初服則已耳知究竟
何如有便乞一相聞尊价北來不唯有慢兼復勞其管
顧極不能安拙刻農遺前三叔太欲刻弟以乘便自刻
之今恐郡中欲翻刻則尚有增定乞一徐之當寄回也

使還率此附謝老太翁三叔太乞叱名致意諸容嗣展
不盡陽月十四日弟光啓又頓 沖

徐子先自笑札

小行書烏絲闌箋

竊嘗自笑且自恨世間之闡茸未有過於弟者也而年
來尤甚應酬之書堆案盈几必使人敦迫至再至三即
黽勉作答稍無人來剝啄即日復一日乃至遷延歲月
耳遷延既久愧負既積更難伸紙如書生賴學愈久愈
怖也即如老親家瀕行雅愛超踰常格入都已來再承

手翰中以重旣然自張年兄使者却還爾時一失便日
延一日以至於今所以然者嵇叔夜只是一懶而弟又
益之病與冗焉夙昔多疾疢至今始衰更非疇昔昨歲
偶以多言之故謬用歷法見推初意亦知其難第此事
三百年來無人講究如偶有所見而復爾推委似非古
人進不隱賢之義是故有相諮問者不敢不竭盡底裏
自後又不得不向此中一研究而精力未及又無佐史
可分益令萬事都廢自惟欲遂以此畢力并應酬文墨

一切迸除矣何者今世作文集至百千萬言者非乏而為我所為者無一有歷雖無切于用未必更無用于今之詩文也况弟輩所為歷筭之學漸次推廣更有百千有用之學出焉如今歲偶爾講求數種用水之法試一為之頗覺于民事為便今為二三相知所迫已付梓人尚未及卒業請教耳小兒處有一稿亦略曉其法尚未能全諳也此等事非老親家夙昔同志豈敢發此狂僭之言乎萬惟秘之弟年來百端俱廢者大半為此事所

奪然此事畢竟浩渺非有同志同業數輩益以書佐未
易得了弟姑為所得為以竢其人如老親家暨三太翁
則所日夜冀望北來者也料今秋必奮圖南之翮秋冬
之交可得握手道故矣

薛明益與少室札

疏先生搜羅丘索吳人士罔不仰之區區岳事必且一
網無遺者一半云云方以為先生非秘即謙言耳乃復
固讓如此耶弟言之恐無信者蒙扇頭細楷精絕目力

如童令人歎服尚有所求總容懷報承發程史雖不詳
岳事然不可不卒業今日為武司農見召明日塾師到
館皆不能對案計望左右可歸趙矣弟既蒙雅愛尚須
沐浴願封談岳祇以魯鈍善忘必求不憚煩勞再檢祠
錄一覽不啻以金鑑濟矇叟也功德豈可量哉敢此申
懇幸惟慨諾不具教下薛明益頓首大宗工少室先生
足下 綱鑑恐未悉故瑣瑣如此伏冀原亮

口正志片言期許帖

行書朱絲闌紙本

足下猥以好者之口信一不識面目之人片言期許遂
欲定為白首之交俯仰今古良足矜詫然亦以不得見
足下為憾固知造物者忌之要自有合并時耳弟廬棲
三載塞兌守雌自分名不掛通人之籍矣頃荷主恩移
擢理官疏腸徧性動與世忤豈若婆娑山巖優游載籍
可藉以無咎無譽而二三君子諭以大義督之就道勉
欲於此月中旬渡江泛彭蠡矣此行倘挹九華匡廬之
勝其恨不得與足下同遊更當何如聲遠寓荆溪未有

合者獨謬辱獎借時時把臂論心此推足下受不淺宗
遠境與行合亦不多得識足下在吳生之先尤其奇邁
也海公別去即世外人無兒女子態亦有依依不忍舍
者然弟不久當作還山計與二三知己結社以老耳勿
冗中草率據案佈候扇頭一律聊伸積懷殊不足以酬
珠玉也諸惟神照不盡瞻馳弟正志九頓首 左之

黃銅山

周道與蔣八公札四則

八公閣下知垂念之至凡可以開天心起月骨者閣下

必念之熟矣秦紘以黃絹解辜嘉留以索菓脫網周肉
非黃羊命隨野鹿微閣下誰復生我者叔向有言能救
我者唯祁大夫耳綸靡天上誰傳羊舌之言生平孤挺
枝葉無陰死生區區已委之命必使聖主不失其仁貞
士不傷其身亦君子之所厯閱也六月二十日南昌字
已墜黑海不問慈航然猶白日清晝也乃云某以三百
金買涂某又云某受石帆百金如此鬼夢誰為受者即
如一僕柴敬十月始來而坐送潤山書擬徒悠悠蒼天

此何人乎欲出一疏到底不敢詩云匪言不能胡斯畏
忌正如昔人所云不過使後人惜之耳徐夔老儻晤亦
幸商之講學結社業已自認罪過至如送禮求薦餽金
求救人類中寧有此理昔子瞻不辯蘇朱晦翁不辯祠
魔正叔亦唯唯受罪今即不敢辯今寧無有心眸人相
痛惜者東翁撰文蚤晚面閣亦幸及蚤商之遲爰書成
無及矣草草仰付一笑

紬繹時習不愠之誨切實受用然去住未定下手點脚

了無是處前為易象正完之已久而同人借鈔踰月未
畢未有以請教者獄市中賣朝冠亦徒為人駭歎耳更
十日當追還以乞鑒定近見報纔知禁旅事動聖念此
均在戊寅四月叩頭力爭者也惜天聽之遠耳大司寇
比又請告則疏未得上雖求極邊安可得乎寫孝經已
過五十部意亦稍倦別欲起草又苦無書每想一事瞠
目長歎而已尊翁資如何可受今藉孝經二本導還之
闕

事都不復知如督撫俱在則尚可收拾終是拋棄

不得自武陵議棄義州來寧錦已不能獨存惜前疏之
就閣也從祀疏出年閣手中亦是聖賢靈慧然非罪人
所當聞耳紅毫筆號調元者再給二枝則事濟矣餘惟
謝謝不悉

井底望星辰率率書今文六十五本意倦甚乃取少時
定本書之又二十五本如鐵皂莢之破香氣也此事紅
疏甚詳不宜更定然自唐人而下異論間興先儒亦疑
其闕誤近會稽虞本及中州呂本吾鄉玄子刻皆依國


學所頒石臺耳此中無書不復記憶驟書定本恐滋唇
舌有乖艱貞之義今已不書矣願台翁為掩其疵也今
文皆散去唯定本在一二吾輩處想省諸煩喙得教甚
感感也諸聽蒼穹不敢復云賜炭已領悉前蛋粟幸都
拜惠但出入未便多間二日鳴謝為遲悉覆蓋之有左
傳幸覓一部查對數日也聞亨老異信未審果否竟寂
寂亦異事也

周廷鑑張壽孫二跋見前

釋彞簡佳偈帖

行書

彞簡再拜報恩僕至承佳偈和章見寄讀之其於高妙處深知徑山家法得不寂寥甚慰甚慰然龍河熱鐵輪若非老漢也難當此一笑一笑但老病之軀致賢弟有寒暑之念衾遠及不勝愧感鶴林青鞵報恩茶壺卧褥等物同至一日之間得整舊儀何以當此相見時就出此簡致謝幸甚天禧方丈亦為助喜囑筆申意不一彞簡再拜復甘露堂上和尙法弟五月十六日



六藝之一錄卷三百九十九